



KELANTAN
ENAKMEN 4 TAHUN 1994
ENAKMEN MAJLIS AGAMA ISLAM DAN ADAT ISTIADAT MELAYU
KELANTAN 1994
BAHAGIAN II - MAJLIS AGAMA ISLAM DAN ADAT ISTIADAT MELAYU
KELANTAN
JAMAAH ULAMA'

JAMAAH ULAMA'

Seksyen 33. [Penubuhan Jamaah Ulama'](#).

Seksyen 34. [Mesyuarat Jamaah Ulama'](#).

Seksyen 35. [Pemakaian peruntukan yang sama.](#)

Seksyen 36. [Fatwa.](#)

Seksyen 37. [Rujukan yang mesti diikuti.](#)

Seksyen 38. [Adat istiadat yang tidak berlawanan.](#)

Seksyen 39. [Fatwa yang diakui.](#)

Seksyen 33. Penubuhan Jamaah Ulama'.

(1) Maka hendaklah ditubuhkan bagi maksud menasihati Majlis atau lain-lain perkara berhubung dengan fatwa yang hendak dikeluarkan mengikut mana-mana peruntukan yang terkandung di dalam Enakmen ini, suatu Jamaah Ulama' yang terdiri daripada –

- (a) Mufti sebagai pengerusi;
- (b) Timbalan Mufti; dan
- (c) tidak kurang daripada lapan, tetapi tidak lebih daripada lima belas orang ahli lain.

(2) Ahli-ahli Jamaah Ulama', selain daripada Mufti dan Timbalan Mufti, hendaklah dilantik oleh Kebawah Duli Yang Maha Mulia Al-Sultan bagi suatu tempoh mengikut budicaranya dengan tauliah yang ditandatangani dan dimeteraikan mohornya dan Kebawah Duli Yang Maha Mulia Al-Sultan boleh, pada bila-bila masa, membatalkan mana-mana perlantikan itu.

(3) Semua perlantikan dan pembatalan di bawah seksyen ini hendaklah diberitahu melalui *Warta*.

Seksyen 34. Mesyuarat Jamaah Ulama'.

(1) Mufti hendaklah menjadi pengerusi mesyuarat Jamaah Ulama' dan semasa ketiadaannya, Timbalan Mufti dan semasa ketiadaannya mana-mana ahli yang hadir bolehlah memilih dari kalangan mereka pengerusi mesyuarat itu.

(2) Pengerusi dan dua pertiga daripada ahli-ahli Jamaah Ulama' hendaklah menjadi korum untuk menjalankan mesyuarat.

(3) Jamaah Ulama' boleh, tertakluk kepada Enakmen ini dan dengan kelulusan Majlis, membuat prosedur dan amalannya sendiri.

Seksyen 35. Pemakaian peruntukan yang sama.

(1) Peruntukan berkenaan dengan ahli Majlis di bawah seksyen-seksyen 13, 14 dan 15 hendaklah terpakai kepada ahli-ahli Jamaah Ulama' seolah-olah bagi perkataan "ahli Majlis" digantikan dengan perkataan "Jamaah Ulama'".

(2) Peruntukan di bawah seksyen 32 hendaklah juga terpakai kepada ahli-ahli Jamaah Ulama'.

Seksyen 36. Fatwa.

(1) Mana-mana orang dengan secara bertulis, boleh meminta Majlis mengeluarkan fatwa tentang apa-apa masalah mengenai Hukum Syarak atau Adat Istiadat Melayu Kelantan, dan apabila permintaan seumpama itu diterima, Setiausaha hendaklah segera mengedarkannya kepada Pengerusi Jamaah Ulama'.

(2) Jamaah Ulama' hendaklah menimbang tiap-tiap permintaan itu dan hendaklah, melainkan pada fikirannya masalah yang dikemukakan itu adalah tidak munasabah dan kerana sebab-sebab tertentu tidak patut diberi jawapan, menyediakan satu draf fatwa baginya, dan jika draf fatwa itu dipersetujui, sama ada dengan sebulat suara atau dengan suara yang terbanyak, maka pengerusi, bagi pihak dan dengan nama Majlis, hendaklah mengeluarkan fatwa.

(3) Jika masalah yang dikemukakan itu tidak dapat diselesaikan dengan fatwa mengikut cara-cara di bawah subseksyen (2), maka Jamaah Ulama' hendaklah merujuk masalah tersebut

kepada Majlis yang akan mengeluarkan fatwanya dengan berpandukan kepada pandangan dan pendapat Mufti:

Dengan syarat, bahawa dengan sebab-sebab khusus, mana-mana masalah bolehlah disembahkan oleh Majlis kepada Kebawah Duli Yang Maha Mulia Al-Sultan untuk mendapat penentuan Baginda.

(4) Jamaah Ulama' boleh, atas daya usahanya sendiri, pada bila-bila masa, membuat dan mengisytiharkan apa-apa fatwa bagi pihak dan atas nama Majlis.

(5) Walau apa pun yang berlawanan dengan mana-mana undang-undang bertulis, Mufti tidaklah boleh disaman untuk memberi pendapat atau keterangan mengenai undang-undang Islam di dalam mana-mana Mahkamah Awam atau Mahkamah Syariah, tetapi jika di dalam Mahkamah lain daripada Mahkamah Syariah, sesuatu soalan Hukum Syarak patut diputuskan, Mahkamah itu boleh meminta Mufti memberi pendapat mengenai hal itu, dan Mufti boleh memberikan pendapatnya kepada Mahkamah itu.

Seksyen 37. Rujukan yang mesti diikuti.

(1) Semasa mengeluarkan fatwa di bawah seksyen 36, Majlis atau Jamaah Ulama' hendaklah pada lazimnya mengikut qaul muktamad Mazhab Shafie.

(2) Jika Majlis atau Jamaah Ulama' berpendapat bahawa qaul yang muktamad dari Mazhab Syafie boleh membawa kepada keadaan yang berlawanan dengan kepentingan awam, Majlis atau Jamaah Ulama' bolehlah dengan keizinan Kebawah Duli Yang Maha Mulia Al-Sultan mengikut qaul dari mana-mana Mazahab Islam yang muktabar, kecuali dalam perkara-perkara yang bersangkutan dengan akidah, maka qaul Ahli Sunnah Wal Jamaah hendaklah diikuti.

Seksyen 38. Adat istiadat yang tidak berlawanan.

Mana-mana adat istiadat Melayu atau undang-undang adat istiadat Melayu yang masih diamalkan di Negeri ini dan tidak berlawanan dengan pengajaran Islam hendaklah diambilkira ketika mengeluarkan mana-mana fatwa di bawah seksyen-seksyen sebelum ini.

Seksyen 39. Fatwa yang diakui.

Mana-mana fatwa yang dikeluarkan oleh Majlis atau Jamaah Ulama' atau apa-apa keputusan mengenai masalah yang dibuat oleh Kebawah Duli Yang Maha Mulia Al-Sultan seperti yang dimaksudkan di bawah seksyen 36 (3), jika diperintahkan oleh Baginda, hendaklah *diwartakan*.